



Daifim


An Official Organ of YMA, Khuangpuilam Branch.

YMA MOTTO



Hunawl hman that
Zofate hmasawwna ngaihtuah
Kristian nundan tha ngaihsan

Khawchin : Source - Accuweather.com



Ruah sur thei dinhmun.
Temp - Max: 26°C Min: 15°C
Dar 5:21-ah ni a chhuak ang a,
Tlai Dar 5:31-ah a tla leh ang.

Vol - VI Issue No. - 9

- Vau Thla -

22nd March, 2020 (Pathianni)

Tunkar chang vawn : 1 Joh. 5:14
"A duh zâwng anga eng pawh kan
dîl chuan min ngaihlâksak thîn, chu
chu amah kan nêl chhan chu a ni."

Covid-19 vangin hruai leh

Kar kal ta mai khan hmun dang ațanga rawn haw, ina inkhung hrih tura tih ni si a thuawih loa pawn lo chhuak an awm tih hriat a ni a. Hriat a nih vele hruaitute'n damdawi in lam leh hotute biain khung hran tura damdawi ina lak pheih leh a ni. Tin, chhungkaw thenkhat pawh pawn chhuak loa in lama inkhung hrih tura tih an awm bawh a ni.

Hruaitu leh mithiam zawkte thurawn hi kan pawm a, kan zawm tlan a pawimawh hle mai. Fimkhur lohna avangin mi pakhat chauhin tuar dawn se chuan tun ang hian hmalak a ni lo ang tih hriaa, pakhat fimkhur loh vang hian ram pumin a tawrh phah thei tih hre nawn leh ang u.

I inthlahdah leh i hlauh loh avangin midang tithlabar suh.

TASK FORCE ON ESSENTIAL COMMODITIES THUKHAWM

Vau thla ni 20, 2020 (Zirtawpni) khan Task Force on Commodities member-te chu an Chairman Pu HL Rochungnunga, Food Civil Supplies and Consumer Affairs (FCS&CA) Commissioner & Secretary hovin a pisaah an thukhawm. He Task Force hi COVID-19 vanga mipui nitin mamawh (essential commodity)-te chheprelh, a man pangngai aia toa hralh leh hralh rukte a awm loh nana hma la tura din a ni. Supply Department leh Legal Metrology tangkawp chuan bazarah leh dawh hrang hrangah man pangngai aia sanga bungrua lei leh hralh a awm lohna turin hma an la mek.

Tun dinhmunah Mizoramah pangngai takin supply a awm reng a, essential commodities pawh mamawh tawh ang neih reng a nih thu meeting-ah hian sawilan a ni a. Chutihruah chuan mipui mamawh zualpui eirawng bawlna gas, petrol, diesel leh buhfai phur motor ten rang zawka check-gate an paltlang theihna turin hmalak ni se an ti bawh.

Hri leng chungchangah Joint Meeting nei

Dated Khuangpuilam, the 22nd March, 2020 (Pathianni) :

Hri leng mek Covid-19 chungchangah ni 18 Vau thla khan Khuangpuilam Branch YMA leh Village Council-te chu thukhawmin hetiang hian thuchhuah an siam a, ni 19 ațang khan hman tan a ni.

1. Vengchhung pawl hrang hrang ten, COVID-19 hrileng avangin thu leh awm hma chuan puipunna thil huaihawt rih loh tur a ni a. Mimal leh chhungkua pawhin hei hi zawm tur a ni a, mahni inlam a awm tam tur leh, tar leh naupang zawkte pawn chhuak tam lo turin kan inhriattir a ni.

Thenawm khawvengte pawh a theih chin chinah inlen pawh lo hram turin kan inngen a ni.

2. Hri leng mek chungchangah sawrkar thuchhuak chauh ngaihchan tur a ni a, Social Media a thu post naran avangin veng mipui te chiahi lo tura ngen kan ni.

3. Insawithaihna lam leh sawi nêp uchûak zawnga Social Media hmanga thu post lo turin kan inngen a, mi rilru ti-chiâi thei zawnga mahni ngaihdan a post siam loh tur a ni.

4. Nitin mamawh lei leh hralh chungchangah District Magistrate thuchhuah ang chauh a kal tur a ni.

5. Mahni a inrinhlelna neih chuan, kimki mai lovin mithiam te rawn vat thin tur a ni.

6. Hnam dang leh ram dang mi sumdawng, mimal ina kalkual thin te pawh phal loh a ni.

7. Loh theih lohah lo chuan Ram pawna zin rih loh nise, ram pawn ațanga rawn haw te kan awm a nih chuan ni 14 chhung chu pawn chhuak lo tura ngen leh beisei kan ni a. Loh theih loh avanga ram pawna zin chhuak leh lut tur kan awm chuan heng numberah te hian inhriattir tur a ni.

Branch President : Pu HD Daniela, 8837206466

Branch Secretary : Pu Lalremsiama Varte, 9862327112

8. Mitthi leh khawhar lenpui chungchang: Hri thalo len chhung, thu leh awm hma chuan heng a hnuai a mite ang hi kalpui tur a ni ang (Thih chhan hi eng natna pawh nise, a hnuai a mi ang hian kalpui vek tur a ni)

a) Zing dar 9:00 hmaa boralte chu chawhnu dar 1:00-a vui tur a ni ang.

b) Chawhma dar 9:00 ațanga dar 12:00 inkara boralte chu chawhnu dar 3:00-ah vui a ni ang.

c) Khualkhua ațanga ruang rawn thleng pawh a chung a mi ang khian an rawn thlen dan a zirin vui tur an ni ang.

d) Lumen chu a tuk chawhma dar 10:00-ah vui tur a ni.

e) Khawharin lenpui chu zan hnihah tihtawi a ni. Lumen a ngai a nih chuan zan thum hman tur a ni ang.

f) YMA hun bikah hian mipui nawlpui a kal lovin, BEC member leh an awmna Section hruaitu ten lenpui tur a ni.

g) Thlan laih chungchang chu Branch hruaituten a remchan dan angin ruahmanna an siam ang.

h) Khawhar chhungte puala YMA-in Ralna bawm a dawh thin chu tihtawp rih a ni a. Tin, mitthi buhfai leh thildang khawn ngai chi pawh tihtawp rih a ni ang a. Branch-in khawhar chhungte chu Rs 1000/- in a ral ang.

9. Hri leng avanga nitin mamawh ei leh bara chhuanchham kan awm chuan Branch YMA in theitawp a puih a inring reng a ni.

YMA chu tanpui ngaite tanpuitu a ni. – YMA Kumpuan : Zirna uar

Editorial Board :
 Represent: Pu Rotlingpuia
 Editor: Pu Ricky MS Dawngzela
 Jt. Editor : Pu Lalsiamkima
 Treasurer: Nl. Florence Zoremsangi
 Cir.Manager : Tv. Samuel Lalpekhlua
 Contact No: 9862501858 / 9612691291
 9612761781 / 7005494983

FLS Station - 9612566886
Chawngbawla Section
 Leader : Pu F. Lalbiaksanga
 96121 55162
 Secretary : Tv. R. Lalnunluanga
 82599 60032
Vanapa Section
 Leader : Pu Lalchuaailova
 87300 99599
 Secretary : Tv. Lallawmzuala
 87875 41803
Khuangchera Section
 Leader : Pu Lalramzaua
 76408 95924
 Secretary : Pu Zachungnunga Hrahse
 76299 69989

Editorial.....✍
Thil engemaw a lo thlen hian kan lo hmachhawon dan hi a in ang lo theuh a. Ngaihdan tam tak a lo pianga. Thenkhat thil lo thlen tawh dan leh awm dante lo zir a, lo hriat tawh na atangin fimkhur takin an hmachhawon a; thenkhat erawh chuan hriatna thuk em em pawh nei lovin an ngaihdanin an hmachhawon bawok a. Thenkhatin fimkhur a tha a ni tih hriat lain; thenkhat erawh chuan fimkhur chu dawihna, pian thar lohna emaw hiala ngaiin an pawng hmachhawon ve bawok.
Tun hrilengah pawh hian chutiang chu a hmuh theih. Hma thlir zau zawok neih avangin sawrkar mai ni lo kohhran hial paw'n Biak In inkhawm chawh rih turin an rel hial a ni. Nie, thenkhat chuan kohhran pawh an hmu rohle mai. Mahse, ngaihtuah teh ang, tuna hrilenga a chhuahna hmun China tih loha sang chak ber nia an sawi S. Korea, Kristian ram tiin a sawi theih ang chu, hri a punna chhan pakhatan sawi chu Shincheonji kohhran, Daegu khat chhim lama inkhawm thiinte atangin mi 100 vel dawn lai hmuhchhuah a nia; tin, S. Korea-a Covid 19 vei zawng zawng zaa 90 dawn lai chu Daegu khua a cheng niin an sawi a ni. (bbc.com & channelnewsasia.com)
Chuwangin rilru dang pu lova, kan zavaia kan tan tlan a pawimawh hle mai. Kan pastor-te leh kohhran hruaitute hian he natna avang hian martar an cho viau ang; mahse, anmahni chauh nilo, midangin an tuar ve theih avanga hetiang hma la ta an nih a rinawm.
Tin, mithiam, a zira zirte'n tih tur min hrilh hi keini ak zat hnih hnuailam hian kan ngaihdan anga lo thlaksak i tum lo ang u. Hetia social media-a thu kan vawrh darh zungzung lai hian anni chuan a natna thlentu virus kha an lo zirchiangin, engtianga hneh theih ching a nih dawn tih an lo ngaihtuah char char a nia aw!!

Branch YMA Office Bearer		
President Pu HD Daniala 9863212083	Secretary Pu Lalremsiama Varte 9862327112	Treasurer Pu David lalrosanga 9436158962
Vice President Pu S. Lalthangliana 8787326114	Assistant Secretary Nl. Florence Zoremsangi Sailo 9612761781	Financial Secretary Pu Rotlingpuia 9862385193

K o h h r a n H u a n g

Presbyterian Kohhran
 Synod Officers Meeting thuchhuah zulzuiin thu leh awm hma chu a huhova kohhran Pathian biak inkhawm, KTP inkhawm, Kohhran Hmei-chhia leh KPP inkhawm neih loh ni se tih a ni a. Amaherawh chu, kohhran inkhawm hun pangngai Nilai zan, Inrinni zan, Pathianni nileng leh zanah te Kohhran Committee-te an inkhawm thin dawn a ni.

KAR KHAT CHHUNG PARTIAL LOCK DOWN NEIH REL TA

Covid-19 avanga tawrhna rapthlak thleng thei laka mipuite kan him zawk nan State Level Task Force, ni 21 March, 2020-a SAD Conference Hall-a thukhawm chuan kar khat chhung Mizoram pumah 'Partial Lock - Down' neih turin a rel a. An thutlukna hi Council of Minister-ah thlen nghal a ni.

State Level Task Force meeting hi Chairman Pu Lalnunmawia Chuau-ngo, Chief Secretary kaihhruaina hnuaiah neih niin Health & Family Welfare Minister Dr.R.Lalthangliana pawhin meeting hi a telpui a. Covid-19 laka invenna tur leh tawrhna thleng thei tiziaawm tura hmalakna hrang hrangte sawiho a ni a. Mitthi sawngbawl leh vuina programme hman dan tur kalphung te, mitthi lumen leh khawhar lenpui chungchang te, market khar leh mipui veivahna city bus leh transport motor khuahkhirh te, khualzin leh Mizorama lo lut te lo khung hranna leh enzui dan tur chungchang te sawiho a ni a.

Covid-19 hrileng meka tuna India ram dinhmun te thlir chungin Mizoram pum huapa sawrkar leh local level-a hmalakna hrang hrang te mipuiin thuawih taka kan zawm theihna tur leh hmalakna te a sawt lehzual theih nan kar khat chhung Partial Lock down neih hi State Level Task Force chuan a tulin a hria a. Thil awm dan a zirin hei aia rei pawh Partial Lock-Down hun chung hi a tul anga pawhsei theih a ni ang.

Partial Lock down neih chhung hian sawrkar office-te erawh chu khar vek a ni dawn lo va, emergency leh mipui mamawh thil pawimawh bik te pawh a huam dawn lo a ni. State 🙏

CYMA hmalakna

13.3.2020: DC Conference Hall-ah 'District Level Standing Committee of Summary Revision of LC/VC Rolls meeting' neih a ni a. Dr. Malsawmliana, Asst. Secretary a tel.

- Mizo Photographers' Society buatsaihin Chanmari YMA Hall-ah 'Chapchar Kut Lady 2020' result puan leh lawmman semna hun hman a ni a. Pu Lalhmangaiha, CEC a tel.

- Central YMA hnuaia Vigilance Sub-Committee-te'n Vairengte Checkgate-a ILP pek chhuah dan a hmunah an zirchiang a. Mizoram chhunga Petrol pawlh dal leh Gas khawih chingpen an check tel bawk.

14.3.2020: Corporate Centre-in TDS Deduct lohna tur system thar an ruahman tak avangin SBI Regional Manager-in CYMA OB leh MJA member-te Curry Pot Restaurant-ah TDS chungchang sawiho paha chawchhun fak pui tura a sawm angin he hunah hian OB-te an tel.

17.3.2020: Minister, Health & Family Welfare Department Pisa-ah COVID-19 chungchanga hmalak zel dan tur meeting neih a ni a, CYMA OB-te an tel.

19.3.2020: DC's Conference Hall-ah 'District Level Task Force on Corona Virus Outbreak meeting' neih a ni a. Pu Lalchhuanmawia, CEC a tel.

- Chief Engineer, PHED Pisa-ah 'Water Tarrif Review Meeting' neih a ni a. Tv. Lalhmachhuana, Vice President a tel.

Level Task Force thu chhuak angin vawiin khan Home Department chuan ILP pek chhuah pawh vawiin atanga titawp turin thu a chhuah nghal a ni.

Health & Family Welfare Minister Dr.R.Lalthangliana chuan Covid-19 laka Mizoram kan him theihna tura sawrkar hmalaknaah kohhran hrang hrang te, Local level task force te, tlawmngai pawl te leh mimal thahnem ngaia inpe te chungah lawmthu a sawi a. Tuna India ram dinhmun ngaihtuahin Mizoram chu tha thlah hman a ni lo a. A bik takin tun thla chung chu nasa lehzuala theihtawp chhuah chhunzawm turin a ngen a. Mipui te pawh sawrkar hmalakna thu awih taka tawiawm turin a ngen a ni.

Nl. Florence Zoremsangi Sailo chu Branch Asst. Secretary atana ruat a ni.

Rev. K.Lalthlanpuia

Vawiin kan kan kohhran mai ni lo, kan bial, kan khua, kan ram, kan khawvelin hun danglam leh hrehawm tak mai kan tawng mek a, Kan inkhawm, a huho va Pathian biakna hun pawh nei thei lovin kan awm a, a hrehawmin a lungchhiat thlak hle a ni.

Kan Bible ah hian Galilee dil hi a lar hle. A thilmak tih leh rawngbawlna hmun pawimawh tak tak te hi he Galilee dil chhehvel hi a ni ber. A zirtir 12 a thlanna hmun pawh helai ruam leh dil kam vel hi a ni. Mipui amah zuitu leh thu ngaithlatute kal sanin, inthiar fihlim san lawk a, chawlh hahdam a duh lawk vang pawh ani ang, lawngin dil kan an tuma, lawngah an chuang ta a. Mahse chu mipui zi hut hut mai kar atanga hahchawlhna hun an hman chhung chu a rei vak lo a nih hmel hle...Lawnga an chuan lai chuan thlipui nasa tak a rawn thawk ta phut mai a. Hemi thleng chungchang hi Luka 8:23 Matthew 8:24 ‘dil chu nasa takin a lo fawn ta a; chutichuan, tuifawnin lawng chu a vûr hlup hlup mai a...’ an ziaak lang vek a ni. Galili dilah hian heng thlipui thleng thut hi thil awm thei tak mai a nih thu zirmite pawhin an sawi thin. Hermon tlang vel atanga thli vawt rawn tleh lut leh Mediterenian Tuipui lam atanga thil lum rawn lut hian hian khawdur leh intham lawkna awm lovin a thlen fo thin a ni. Sangha mantute pawh an inring hman lo fo thin... He hunah hian Isua chuan thil mak leh ropui tak mai a thlen tir tih kan hria, Vawiin a kan ram, kan khawvelin hun danglam leh hrehawm tak mai kan tawn lai hian he thu hmang hian PATHIAN I pawl ila, kan dinhmun I thlir tlang ang u.

I. Beisei loh thil thleng phut a awm fo thin:

Kan nun hman mekah hian kan beisei loh thil vanduaiana leh thihna a thleng fo thin. Kan Bible chang thlanah hian Engkim chungathuneitu leh siamtu chu lawngah khan chuang ve reng tih kan hmu, mah se, thlipui a tleh tho, manganna an tuar ve tho, (v37) tih kan hmu . Isua a awm khan a rawn thlen loh phah lo tlat. Mi tam tak ten kan buaina fo chu Isua zuitu leh neitu kan nih hian ‘kan nunah/ kan chhungkuaah hian eng harsatna mah hi thleng lo tur ngaihna lian tak kan nei ve fo thin. Pathianin min veng tlat dawn, manganna leh harsatna tuar ve tawh lo tura inngaihna kan nei fo thin. Ramthar lama kan ringthar te zingah phei chuan an fate pawh zirna kawngah leh eizawna kawngah pawh hlawhtling ngei tura beisei tlatna, vanduaiana leh harsatna hi tawh ve ngai lo tura in hre tlat kan awm fo thin. Mahse a lo ni chiah lo. Isua hian a hnung zuina kawng hi ‘Faisa ringa khawsakna’ min tiam lova, min tiam zawk chu eng dinhmunah pawh awm ila (In hnenah ka awm zel ang) tiin Mat 28:20 ah khan min hrilh zawk a ni. Isua nena lawnga thlipui tawrh chu a hautak ngawt ang, A tellova tawrh phei chu mangan thlakin, ngaihtuah ngam a ni mang lo zawk.

II. Pathian hnathawh leh chetna hmuh tur a awm lo:

Pahnihna ah chuan heng dinhmun hrehawm leh lo thleng thut, manganthlak takah hian engmah Pathianin rawn tih tum lo leh ngawi tlata hriatna hi a hrehawm ngawt mai. Zirtirte pawh hian an nunna chu chan hlauhawmin, an thi ngei dawn niin an inhria a, *‘Isua an kaithova, a hnênah chuan, “Zirtirtu, kan boral hi pawl i ti lo vem ni?” an ti a. v38 ah kan hmu.* Kan nun hman mekah pawh hian kan tum reng vang ni lovin, kan tih theih bak thil a lo thleng fo thin. Keimahni inveng mah ila, midang thiltih avanga kan tawrhna pawh a thleng fo thin. Heng zirtirte, sangha man thintu, Galilee dil hlauhawm zia hrechiangtuten an dinhmun hrechiangin an beisei Isua kha an mamawh lai taka muhil tlat kha an hre thiam lo, keini ngei pawh hian kan mamawh hun lai taka koh ei zawh lo ni a kan hriatna hian min ti hrehawm fo thin.

Tûnlai kan convid 19 hian kum zabi 16-naa hripui lèn laia Martin Lutheran Kristiante awm dân tûr Rev. Zoramsanga ziah tlem han tarlan tel ka duh a; A hun lai hian hri a leng ve fo thin. kum 9 danah vawi khat a lêng ang a ni e an ti. Hetianga hripui a lo thlen apiang hian mihring 30% vel zetin an thihpui chîn a ni âwm e. Chutah chuan Kristiante tana zawhna lian tak chu: hri lêng hi Kristianten tlânchhiatsan ve tûr a ni em, tih a ni. He zawhna hi kohhran mite leh rawngbâwltute tân a lian lehzual a.

a) Thihna lak a tan in ven hi mi tin mawhphurhna a ni

Hri lêng lak ata sa himna zawn a ÷ul lo nia kan hriat chuan, kan chênna in kâng sela tlan chhuah a cul bik dawn em ni? Kan ril a câm pawhin, “Pathian ro rêl a ni e” tiin chaw kan nghei rêng mai dâwn em ni ang? Indona lo thleng sela, hmêlmate chem sei chu tlân chhe lovin kan lo tuar mai dâwn em ni? Tuiah tla ila, “Pathian ro rêl a ni e” tiin che lovin kan awm reng mai dâwn em ni ang? Pathian phatsanna tûr emaw, kan vengten an tuar phahna tûr emaw a nih loh chuan mi tinin mahni nunna humhim kan tum tur a ni a; hei hi Pathianin mihring rilrua a dah sa a ni tiin Luther-a chuan a sawi.

Luther-a te hun lai hian Kristian chenkhath chuan hripui laka fimkhur emaw, mahni invênhim emaw ÷ul an ti lo va; chutiang ngaih dân chu Luther-an a duh lo hle. Kan nun tihsei nân rim taka thawkin ei tur kan hmu a, chhiatna pumpelth tûrin kan invêng hrâm hrâm a ni si a; hri lêng laka invên phei chu kan tih mâkmawh a ni. Abraham meuh pawhin thihna pumpelth nân a nupui chu a farnu angin a chhâl a, Isaka pawh chuti tho baw; Jakoba chu Esauva kuta a thih loh nân a tlân bo va; Davida pawhin thihna pumpelth tûrin Saula leh Absaloma te a tlânchhiatsan a; Elija pawhin Jezebelin thinûrna a tlânchhiatsan a; Mosia chu Aigupta aţangin Midian ramah a tlânchhia a; Tirhko Paula pawh a sa him nan hmêlmate lak ata a bihrûk châng a awm.

b) Mi a in ven duh lova, mi dang a kai chhawng anih phei chuan sual lian tak a ni. Keimahniin hri kan vei a nih chuan, mi dangte kai chhâwng lo tûrin kan inkhung hrang tûr a ni, tih chu Luthera ngaih dân a ni a. Bible-ah pawh phârte chu an vêngte dinhmun tiderthâwng lo tûrin khaw pâwnah awm tura hriattir an ni a (Lev 13-14). Hri lèn lai phei chuan hetiang inkhunghran hi mi dang kan hmangaihna lantirna a ni a, mahni pawh kan dam chak zawk ang, tiin a sawi.

Fimkhur a ÷ul tih hre reng siin, kan fimkhur duh lova, mi dang kan kai chhâwnga, an thih phah a nih phei chuan tualthat ang kan ni tiin Luthera chuan a sawi chhunzawm. Mi chenkhath phei chuan mi dang kai chhawn an tum lui tlat zâwk a, dam cha reng angin tual an lêng a, anmahni lahin pawl tihna an nei lo va, an nui liam mai mai a. Chutiang mi lek phei chu mihring pawh an ni phâk lo va, an hnêna thu hrilhin awmzia a awm lo va, thuneituten manin na takin an hrem tur a ni. “Chuvangin, i chatpui tûr damdawi ei la; i chênna in, huan leh kawtlai pawh damdawi hmangin thian fâi la; nangmah mamawhtu che emaw, hripui vei hnua dam leh tawh emaw an nih loh chuan mi dang bulah kal lo la, mi awmna hmun hêl rawh; khawpui kâng chelh mih tum ang hrimin bei ang che” tiin a ziaak. Mi dang kai chhâwng lo tûra fimkhur tûrin (🙏 Phek 4-na)

Kristiante chu a fuih nasa hle.

c) Mahni tan a dinhmun hlauhawmah pawh Puitu nei lo (hri kai pawh nise) ãanpui turin Kristian chu a inring tur a ni. Kan vêngte zîngah hri avânga dam lo an àwma, ãanpuitu an nei lo a nih chuan, mahniin kan kài ve hlauhawm pawh ni sela kan pui tûr a ni, tih chu Luthera ngaih dan a ni bur mai. “Mahni sa himna a derthâwn loh chauhvâ mi dang puih tumtu chuan tu mah a ãanpui ngai lovang... I bula damlo i ngaihven lo a nih chuan, Krista pawh dam lovin let reng sela i ngaihven chuang lo vang. ‘A hring a hranin Krista rawn lang sela chu a rawng ka bawl ngei ang’ tia i inhnemna chu mahni inbumna, chapona, inhampuarna satliah a ni ang” a ti. Hetiang hmachhawn tur hian Ringtute kan inbuatsaih lawk a pawimawh. Hrisel chak laia Pathian thu ngaihsak duh si lova, dinhmun chhe bera din hnua mangan leh chûk chu a ãa lo hlein a hria a. Kristiante chu nung tûr leh thi tûrin kan inpeih reng tûr a ni, a ti.

Vawiin hian Martin Luther-a hi kan zîngah awm ta se eng nge a sawi ang le? Kristiante hi theih tâwpa fimkhur tûrin min chah ang a; kan him nân leh kan vêngte him nân, a cûl a nih chuan mahni hmun cheuhah tawm mai tûrin min chah ngei a rinawm. Kan bulah puih ngai an awm a nih erawh chuan, pui thei tûra thiamna nei zawnsak tûr leh, puitu an nei lo a nih chuan keimahniin pui tûrin min chah ang. Sawrkâr hmanga rorêlna hi mipui chatna tûra Pathian ruat a nih avangin, kan himna atâna sawrkâr thu chhuak chu zâwm tûrin min fuih bawkin a rinawm.

Rom lalrama Kristiante a tlêm zâwk an nih lai khan, hripui lên laiin Kristianten damlo an bawihsâwm nasa a, Kristian ni ve lote thlengin an enkawl a; Kristian an awmna khawpuih chuan hri avânga thi an tlêm bik niin historian-ten an ziaik. Kristian pawh an pun phah nasa hle a ni awm e. Kan tan chona a ni. Mizoram chu Kristian tamna ram a ni a eng nge kan danglamna miin min thlir mai thei a nia?

III. Isuan kan koh a hria, kan manganna a hria:

Isua khan thlipui hrang leh tuifawn kha hmu mai rih lo mahse a zirtirte mangang au erawh a hrechiang hle. Nu in bedroom a naute tap chu room dangah insu chung pawhin a hre vat a, Isua hian a mite mangang au hi a hria. Vawiinah hian kan leh mangang au aw hi a hria a ni. *Ngai teh u, Lalpa kut chu chhandam thei lo tûrin tihtawiin a awm lo va; a beng chu hre thei lo tûrin a ngawng hek lo* (Isa. 59:1).

IV. Thlipui lo thleng thut hian Isua min hnaih tir :

Manganna leh Thlipui kan tawh hian Isua lam min pan tir a ni. Nitin hian kan nun hian kan hun hnuhnung kan thleng mek zel a, Kan nitin mamawh leh kan chhungkua tana kan beih leh kan thawh lai hian eng nge kan chungah thleng dawn kan hre si lova, Pathian aiin kan nitin mamawh leh duhzawng hian kan nun a lo chiah zawpin a ral ve tial tial fo thin. Chutih lai tak chuan manganna a lo thleng phut a, Pathian nena kan nun hman, Amah nena kan nun hman tawh dan te leh a hnathawh ropui tak te kha kan ngaihtuaha, Amah nen inzawmna thar min siam sak thei a ni.

V. Thlipui leh tuifawn a awm reng lo:

Galilee dilah hian thlipui leh tuifawn hi thleng thut thut fo thin mahse, tek tlain, khawpui ri dur dur mahse, a fawn reng lo, ban hun a nei. Vawiina kan ram dinhmun khawvel dinhmun ang hi a ni reng dawn lo, thla khat velah chuan beiseina in a reh

kan ring a ni, reh hun a la nei dawn khawp mai. Kan manganna. Chiaina karah hian Pathian thlirin Kohhran hote hian Pathian hnathawh chuan a la ti nem anga, a la chawlh tir ngei ang tih i ring tlat ang u. Kan pi leh pu, nu leh pate khan mahni in lum chhuahsanin, Sa leh Ral hmaah huaisen takin an chhungkua, an khua, an ram an lo chhanhim thin.

Khawvel History a thleng ngai lo hun danglam tak kan hmachhawn mek, in chhungkua, in khua, kan zoram chhanhim nan Ral bei turin Mahni inah awm a ngai ta tlat mai. A huaisen leh a fing tan mahni ina awm hian Ram leh hnam tan kan thawk a ni dawn tlat. ‘Hman’ leh ‘Nakin’ ngaihtuah lovin ‘Tun’ hunah hian I ram tan Inah awm hram rawh’.

VI. Pathianin a rawn che dawn:

Isua chuanna lawng hi vaukam aãanga dil chhunga a tawlh luh hian lawng dang pawh an rualin an kal ve a ni.. Lawng dangte pawh a hnênah a awm a (v36). Anni pawh chhanhim an ni ve tho, Pathian hnathawh dan hian midangte pawh a huam tel zel tlat a ni. Vawiina kan ram dinhmunah hian eng angin nge kan hmachhawn, kan tawrh tih min thlir ve reng thin? Pathian hi kan hnenah a awm takzet em? Kan rinna hi kan lanchhuah tir em? Kan dinhmun hian midangte tan malsawmna leh Pathian rinna a ti chak thei a ni.

Nupa tuak khat rei tak fa nei lo an awma, Pathianin an ãawngtâina chhangin kum engemaw zat hnua fanu duhawm tak a pe a, a hnua pawh fapa a pe leh a... An fapa chu preschool kal rual anih laiin tlai khat chu a accident palh thut mai a, Damdawiinah rang takin an pana, doctor leh nurse ten theihtawp an chhuah a, darkar eng emaw zat hnua chuan Doctor a lo chhuak a, a nu hnenah chuan in fapa dinhmun hi a derthawng khawp mai, chhan theihna chance a tlem hle mai. A thi a nih loh pawhin, a dam anih pawhin pianphunga rualbanlo a ni tawh ang tiin a rawn hrilh a. Inzaina roomah a luh leh dawn chuan an chhungte dang pawh chuan doctor chu beidawng takin an en ringawt mai a... Chutih lai chuan Naupang nu chuan doctor chu a ko let leh a, Ka pu in thahnem ngaihna zawng zawngah kan va lawm em! Kan nau hi Pathian ta a ni a, a tan kan ãawngtai reng thin. Pathian min pek a ni a, Pathian hnenah kan pe let leh e... Pathianin a hnenah a hruai anih pawhin, a tan a ãa zawk ang. A la hruai lo anih pawhin keini pawhin lawm takin kan enkawl zel ang... tiin a thlah a... chutih lai chuan an bulah chuan ‘midang’ an lo awm ve a, chu nu thusawi chuan an thinlung a khawiha, an tan fuihtu leh damna a tling ve tlat a ni.

Pathian hian keini mihringte nuna vanduaia lo thleng thut thin,te, accident te, natna te, ãam leh hrileng a lo thlen hian i Tûnah erawh chuan, aw Jakob-hote u, Lalpa, nangmahni siamtu leh, aw Israel-hote u, nangmahni dintu chuan heti hian a ti: “Hlau suh u, ka tlan tawh che u hi; in hmingin ka ko che u a, ka ta in ni asin. 2Tuite in dai kai lai pawhin kei in hnênah ka awm ang a; luite in dai kai lai pawhin a chîm pil lo vang che u. Meia in kal tlang lai pawhin in kâng lo vang a, meialhin a tialh hek lo vang che u. Kei hi Lalpa in Pathian, Israel-ho Mi Thianghlina, nangmahni chhandamtu ka ni si a... tiin a sawi. (Isa. 43:1–3) Kan beisei loh manganna leh vanduaia thleng thut karah hian, kan manganna karah hian Pathianin ‘Ro a rel’ a ni tih hi I hre thar ang u. Amen